

Script of Evening Gojri News Bulletin 12 August 2024 at 1700

Hrs

ایوننگ گو جری نیوز بلیٹن مورخہ 12 اگست 2024

یوہ آکا شوانی جموں ہے محمد مبارک ماہر تے عبید الرحمان تیں خبر سُنو۔ پہلاں خاص خاص خبر۔

*1 لیفٹنٹ گو رنر منوج سنہا نے اج کشمیر ماہر ترنگا ریلی غی قیادت کی جس ماہر تقریباً 10 ہزار افراد نے شرکت کی۔ وزیر اعظم نریندر مودی نے کہیو ہے کہ جموں کشمیر غی عوام غی طرفوں منعقد کرائی جان آلی ترنگا یا ترا عوام ماہر کا فی متاثر کر رہی ہے۔

*2 لیفٹنٹ گو رنر منوج سنہا نے کہیو ہے کہ بجلی محکمہ غو 28 ہزار کروڑ روپیاں گو قرضو ادا کر دو گیو ہے اور یوٹی گے اندر سب تیں سستی قیمت ور بجلی دستیاب کرائی جا رہی ہے۔

*3 پولیس غا ڈائریکٹر جنرل آر آر سوین نے کہیو ہے کہ وی ڈی جیز ماہر دراندازی مخالف آپریشن ماہر استعمال کیو جائے گو۔

*4 سرکار باغبانی شعبہ ماہر فصل بیمہ اسکیم متعارف کران گو منصوبو بنا رہی ہے۔

خبریں غی تفصیل نال پہلاں محمد مبارک ماہر۔

Tiranga Rally

لیفٹنٹ گو رنر منوج سنہا غی قیادت ماہر جموں کشمیر غا سرینگر علاقہ ماہر ترنگا ریلی ماہر ہزاراں لوکاں نے شرکت کی ہے۔ اندازہ غے مطابق لیفٹنٹ گو رنر غی قیادت ماہر ہون آلی ریلی ماہر 10 ہزار تیں متا لوکاں نے حصو لیو۔ مذکورہ ریلی بو ٹینکل گارڈن تیں شروع ہو غے ڈال جھیل غے کنڈے تیں بوتیاں واں شیر کشمیر بین القوامی کنونشن مرکز ایس کے آئی سی سی پُجی۔ اس موقعہ ور لیفٹنٹ گورنر نے کہیو کہ جموں کشمیر ماہر ہر گھر ترنگا مہم اک عوامی تحریک بن چکی ہے۔ اُن نے کہیو کہ مہارو پیارو تے فاتح ترنگو دُنیا ماہر بلند رہ۔ اُن نے کہیو کہ ہر گھر ترنگا مہم غو حصو بنن واسطے اپنو قومی جھنڈو آن غے بڑا مان تے سمان نال اپنے گھر فہراؤ۔ لیفٹنٹ گو رنر نے مذکورہ ریلی ماہر حصو لین آلا لوکاں گو شکریو ادا کیو۔ اس موقع ور ایل جی موصوف نے جموں کشمیر غا شہیداں ماہر اک فونو گراف وی وقف کیو۔ تے نال ہی ترنگا دستخط مہم گو وی آغاز کیو۔ ات جموں شہر ماہر وی بکھ بکھ مقامات ور ترنگا ریلیاں غو اہتمام کیو گیو۔ جموں شہر ماہر گلشن گراؤنڈ تیں ترنگا ریلی شروع ہو غے بکھ بکھ جگہاں تیں بوتیاں واں اسے جگہ واپس جا غے اختتام ہوئی۔ اس موقعہ ور خطانی کمشنر رامیش کمار، اے ڈی جی پی آنند جین، ایس ایس پی جموں ونود کمار تے جموں بلدیاتی کارپوریشن غا کمشنر رابل یا دو تیں علاوہ مقامی شہریاں نے وی حصو لیو۔ مذکورہ ریلی غو مقصد 15 اگست ماہر آزادی تہاڑو منان تیں پہلاں قومی یکجہتی ماہر باہدو دینو تھو۔ اس موقعہ ور خطانی کمشنر جموں رامیش کمار نے بولتاں واں اس طرح کہیو۔۔۔ بانٹ۔

PM Tiranga

وزیر اعظم نریندرمو دی نے کہیو ہے کہ ترنگا یا ترا جموں کشمیر غا لوکاں واسطے اک حوصلہ افزائی ہے۔ وزیر اعظم نے جموں کشمیر غا لیفٹنٹ گورنر منوج سنہا غا ہر گھر ترنگا ابھیان نانہ بابو دین با رے قدم غی تعریف کی ہے۔

LG Power

لیفٹنٹ گورنر منوج سنہا نے کہیو ہے کہ جموں کشمیر انتظامیہ بجلی غا بڑا قرضان غا بل ادا کرن مانہ کامیاب رہیو ہے۔ اُن نے کہیو ہے جموں کشمیر دوجی ریا ستاں تے مرکزی زیر انتظام علاقان غی بہ نسبت سستی بجلی غی فراہمی جا ری رکھے گو۔ یاہ گل اُن نے ڈل جھیل سرینگر غے کنڈے شیر کشمیر عالمی کنونشن مرکز مانہ اک پریس کانفرنس سنگ خطاب کرتاں واں کہی۔ اُن نے کہیو ہے جموں کشمیر انتظامیہ نے 28 ہزار کروڑ غی مالیت تین متا بجلی گا قرضہ حاصل کیا ہیں۔ اُن نے کہیو کہ ہم ان قرضان غی ادائیگی غی اہلیت رکھاں اور ہوں چاہوں ہے ہم جموں کشمیر مانہ سستی بجلی فراہم کر غے اک ریکارڈ قائم کراں۔ اُن نے کہیو کہ پچھلا 3 بہراں تین لوک سستی بجلی حاصل کر رہیا ہیں۔

DGP VDG

پولیس غا ڈائریکٹر جنرل آر آر سوین نے گذشتہ روز کہیو ہے جے گرائیں حفاظتی گا رڈ ہن سرحدی حفاظتی فوج تے جموں کشمیر پولیس نال مل غے بین القوامی سرحدان ور اپنی خدمات انجام دیں گا۔ جدید طرز غا ہتھیاراں تے رات غا وقت مانہ استعمال ہون آلا آلات نال لیس یہ وی ڈی جی، فوج نال کم کریں گا۔ ضلع سانہ غا راج پورہ علاقہ غے اندر وی ڈی جی ممبران نال گل بات غے دوران اُن نے یاہ گل کہی۔ ڈی جی پی موصوف نے کہیو کہ سرحدی علاقان مانہ ہسن آلا افراد نے ہمیشہ دہشت گردی غاخاتمہ واسطے فوج غو ساتھ دتو ہے۔ اُنہاں نے کہیو کہ وی ڈی جی اک رضاکارانہ خدمت ہے اور اس مانہ ملازمت غی کو ئے ضمانت نہیں دتی جا سکتی۔ لیکن پولیس غو قائم بورڈ اس گل غو اختیار رکھے کہ وہ ان افراد نانہ ان غی خدمت دیکھن تیں بعد با طور ایس پی او محکمہ غے اندر بھرتی کر سکے۔

PM MKB

وزیر اعظم نریندرمو دی رواں مہینہ غی 25 تا ریخ نانہ ملک تے بیرون ملک رہن آلا بھارتیہ شہریاں سنگ اپنا من کی بات پروگرام مانہ اپنا خیالات سانجھا کریں گا۔ ریڈیو ور چلایا جا رہیا اس مہینہ واری پروگرام غی یاہ 113 ویں قسط وے گی۔ مذکورہ پروگرام غا سلسلہ مانہ لوک اپنی قیمتی صلاح باڑی ٹول فری نمبر 1800117800 ور سانجھی کر سکیں۔ اس تیں علاوہ وے نریندرمو دی ایپ یاہ پھر دی مائی گوؤ اوپن فورم ور وی اپنا خیالات سانجھا کر سکیں۔ یہ تمام صلاح باڑی اس مہینہ غی 23 تا ریخ تک موصول کی جا نیں گی۔ جن نانہ وزیر اعظم نریندرمو دی غا آتا من کی بات پروگرام غی قسط مانہ شامل کیو جائے گو۔

RNU EPMKN

علاقائی نیوز یونٹ آکاشوانی جموں نے خبران آلا شعبہ غا سربراہ این گلشن رینہ غی سربراہی مانہ ”ایک پیڑ ماں کے نام“ شجرکا ری مہم غو انعقاد کیو۔ اس دوران کئی نواں بودا لایا گیا۔ آکاشوانی جموں غا کئی افسران تے دیگر عملہ نے پھلاں تے طبی طرز غا نواں

پودا لا گے اس مہم نانہہ کامیاب بنايو۔ واضع رہ جے ياه مہم وزير اعظم نريندرو دي نے اس سال عالمی ماحوليات تہاڑہ غا موقعہ ور شروع کی تھی۔ اس موقعہ ور بولتاں واں علاقائی يونٹ غا سربراہ اين گلشن رينہ نے کہيو کہ ياه مہم وزير اعظم غی بڑی سوچ غی عکاسی کرے۔ اس موقعہ خبر رساں ادارہ غا کئی ملازمين شامل تھا۔ جن مانہہ جگموہن شرما، وجے بجاج، شروتي کھجوريہ تين علا وہ کئی ديگر افراد موجود تھا۔

يہ خبر تم آکا شوانی جموں تين سن ريبا بين خبراں غا باقی حصہ نال محمد مبارک ماہر۔

Crop Insurance

جموں کشمير غے اندر سرکار باغبانی شعبہ مانہہ فصل بیمہ اسکيم متعارف کران غو منصوبو تيار کر رہی ہے۔ جس نال سينکڑاں غی تعداد مانہہ کساناں نانہہ فاندو حاصل وے گو۔ علاقائی معيشت مانہہ باغبانی شعبو اہم کردار ادا کرے اور بے موسمی بارشاں اور قدرتی آفات نال اس سيکڑر مانہہ بہت نقصان وی وے۔ آکاشوانی جموں غا نمائندہ نے خبر دتی ہے کہ اس بیمہ اسکيم غا متعارف ہون نال متعلقہ افراد غی ديرانہ مانگ پوری کی جاسکے گی۔ اور اس اسکيم غے تحت کساناں نانہہ فصلان غا نقصان ور مالی معاوضہ وی دتا جائیگا۔ سرکار بیمہ کمپنیاں تے مالی اداراں غا سانجھا تعاون نال اس اسکيم غی کامیاب عمل آوری خاطر موثر اقدام کر رہی ہے۔ اس ضمن مانہہ کساناں غی بيداری خاطر بيداری مہم تے تربیتی اجلاس منعقد کرایا جائیگا۔ اس فصل بیمہ اسکيم کساناں غے اندر خود اعتمادی غو جذبو پيداوے گو اور وے جدید ذرعی پيداوار غا طریقہ کار اپناویں گا۔ اس اسکيم غی عمل آوری تين بعد کساناں صرف خود کفيل ہو جائیگا بلکہ علاقہ غی معيشت نانہہ مزید بہتر بنان مانہہ وی اہم کردار ادا کر سکیں گا۔

LG Polls

گذشتہ روز ليفٹنٹ گو رنر منوج سنہا نے اس گل غو اظہار کیو کہ جموں کشمير مانہہ تاواں بی اسمبلی انتخابات کرایا جائیگا۔ اُن نے کہيو کہ اس ضمن مانہہ جمہوری مشق غا شیڈول غا پارہ مانہہ فيصلو کرنو چناؤ کمیشن غو اختیار ہے۔ ياه گل اُن نے جموں يونیو رسٹی مانہہ مالویہ مشن ٹیچرس ٹریننگ سينٹر غی نوی تعمیر شدہ عمارت غو افتتاح کرن تون بعد نامہ نگاراں سنگ کی۔ اُن نے کہيو کہ وزير اعظم نريندرو دي نے رواں بہرے جون مہينہ مانہہ سرينگر غا دورہ غے دوران کہيو تھو کہ جموں کشمير مانہہ جلد ہی اسمبلی انتخابات وین گا۔ مرکزی وزير داخلہ امت شاہ نے وی 5 اگست 2019 نانہہ پارليمنٹ مانہہ کہيو تھو کہ حلقہ بندیاں تين بعد جموں کشمير مانہہ انتخابات وین گا اور پھر مناسب ويلہ ور مذکورہ علاقہ نانہہ رياست غو درجو دتو جائے گو۔ اُن نے اس گل ور اعتماد اظہار کرتاں واں کہيو کہ جموں کشمير مانہہ تاواں بی جمہوری مشق غو انعقاد کیو جائے گو۔ ليفٹنٹ گو رنر نے کہيو کہ بھارتیہ چناؤ کمیشن نانہہ اسمبلی انتخابات با رے ترتيب دین گو خصوصی حق حاصل ہے۔ واضع رہ جے جموں کشمير مانہہ 2018 مانہہ پی ڈی پی تے بی جے پی مخلوط حکومت غا ٹہن تون بعد 6 سال تين متا عرصہ تک مرکزی سرکار غی حکمرانی غے تحت چل رہیو ہے۔

Govt SAR

جموں کشمير سرکار نے سرکاری ملازمين واسطے ایس اے آر رپورٹ جمع کران غی آخری تاریخ مانہہ توسيع کر دتی ہے۔ سرکار غی طرفوں جاری اطلاع نامہ غے تحت ای پی ایم

پورٹل ور اپریل تے جون مہینہ تک غی ایس اے آر رپورٹ ہن 20 اگست 2024 تک جمع کرائی جا سکے۔ اس تیں علا وہ ملازمین غو ای پی ایم پورٹل ور اجیں تک اندراج نہیں ہوؤ اُن نانہہ ہدایت جا ری کی گئی ہے کہ وے اس پورٹل ور اندراج کرا غے متعینہ مدت غے اندر اپنی ایس اے آر رپورٹ جمع کراویں۔ واضح رہ کہ ایس اے آر رپورٹ جولائی غا پہلا ہفتہ مانہہ جمع کران غی ہدایت جا ری کی گئی تھی۔ ور بڑی تعداد مانہہ ملازمین کجھ وجوہات غی بناء ور رپورٹ جمع نہیں کرا سکیا۔ اور اس تیں علا وہ سرکار نانہہ آخری تا ریخ غی توسیع واسطے کئی درخواست وی موصول ہوئی۔ جس غے پیش نظر ایس اے آر رپورٹ جمع کران غی آخری تا ریخ مانہہ توسیع کی گئی ہے۔

HRT Reasi

ضلع ریاسی غے اندر ”برگھر ترنگا“ مہم گرام پنچایت آگار جیتو مانہہ وی دیکھی گئی جت تمام گھران، سرکاری تے نیم سرکاری دفاتر غا چھت ور قومی جھنڈو چڑھایو گیو۔ واضح رہ جے اس گران مانہہ 224 کنبہ بسیں اور گران غا سرپنچ غی سربراہی مانہہ اک گرائیں سطح غی کمیٹی تشکیل دتی گئی ہے۔ اس دوران کئی کنبیاں نانہہ جھنڈا تقسیم کیا گیا۔ اس مہم مانہہ خواتین تے بچاں غی فلاح و بہبود محکمہ تے دیہی ترقی محکمہ غا کئی افسران نے شرکت کی اور ریلی نانہہ کامیاب بنایو۔ اس موقعہ ور بولتاں واں خواتین تے بچاں غی فلاح و بہبود متعلق ضلع افسر سچن شرما نے اس طرح کہیو۔۔۔ بانٹ۔۔۔

اس غے نال ہی خبراں غو یوہ بلیٹن ختم ہوؤ۔